

Syngjande Vaksdal

Vaksdal kommune er syngjande kommune gjennom Krafttak for sang frå 2019, satsinga vil vare i tre år. Me er i startfasen av prosjektet, og utover våren vil innbyggjarar og tilsette merka at me er ein syngjande kommune.

Songutvalet fungerer som eit styre for prosjektet. Desse er med i songutvalet: Hege Eide Vik (leiar), Janne Elin Matre, Nina Heimdal, Ole Hesjedal, Monika Dahle Skjerveggen, Sindre Sortland.

Første møte i songutvalet var 5. februar, og det vart bestemt at me ynskjer at «Song i lokalmiljøet» skal vera det overordna temaet for 2019. Me ynskjer at innbyggjarane skal merka at me er ein syngjande kommune så raskt som mogleg.

8. mars var det oppstartsmøte og kursing av utvalet ved konsulent og songpedagog Signe Sannem Lund frå Krafttak for sang på Dale. Me oppretta Facebooksida Syngjande Vaksdal, og på denne sida er Songutvalet administrator saman med Krafttak for sang. Me samarbeider også med Mona Mekki om publisering på heimeside og kommunen si Facebookside. På dette møtet fekk me ein roll-up med kommunevåpen som står i Heradshuset. Denne vil bli erstatta med ny roll-up på nynorsk. Me har også etterlyst plakatar og anna materiell på nynorsk, og dette skal Krafttak for sang skaffe.

20. mars hadde songutvalet sitt foreløpig siste møte der det vart bestemt at Song i Eldreomsorgen er tema for årets fagdag. Kurshaldarar frå denne satsinga kjem til kommunen og held kurs for dei tilsette i eininga. Oppstartsfest for Syngjande Vaksdal vert under Daledagane. Her skal allsong vera tema. Me forpliktar oss også til å ha allsong ved fleire store offentlege arrangement i kommunen gjennom året.

27. og 28. mars var 3 personar frå utvalet på seminar i Oslo saman med dei andre syngjande kommunane. Her fekk me svært nyttig kursing både praktisk og musikalsk, samt godt høve til erfaringsutveksling med representantar frå andre syngjande kommunar.

1. juni skal tiltaksplan for 2019 vera klar.

Me vil også starta arbeidet med å lage Vaksdal kommune si songbok – songar alle i Vaksdal kommune kan. Her legg ein sjølv sagt opp til stor grad av innbyggjarmedverknad.

Det er songutvalet sitt ynskje og intensjon at det å vera ein syngjande kommune skal vera positivt og kjennast som ein bonus for alle tilsette og innbyggjarar.

Syngjande kommunestyre? Vil kommunestyret markere Syngjande Vaksdal med ein song ved møtestart? I så fall: Ynskjer kommunestyret å starte med ein fast song? Skal partigruppene ha ansvar for å bestemme song etter tur? Ynskjer ein å rullere song etter årstid/høgtid? Her fins det ulike strategiar, og me lar det naturlegvis vera opp til kommunestyret sjølv å bestemme dette.